

## **ORDENANZA FISCAL Nº 20**

# **ORDENANZA MUNICIPAL REGULADORA DA LICENZA POLA POSESIÓN DE ANIMAIS POTENCIALMENTE PERIGOSOS, DO SEU REXISTRO, DA SECCIÓN LOCAL DO REXISTRO DE ANIMAIS DE COMPAÑÍA E DAS TAXAS POLA PRESTACIÓN DE TALES SERVIZOS.**

### **EXPOSICIÓN DE MOTIVOS**

A Lei 50/1999, do 23 de decembro, dictada ó abeiro do artigo 149.1.29 da Constitución española, que atribúe ó Estado as competencias en materia de seguridade pública, asigna no artigo 3 ós concellos a competencia para concede-la licenza administrativa que habilite para a posesión de animais potencialmente perigosos. Ademais, no seu artigo 6, establece que en cada Concello existirá un Rexistro de animais potencialmente perigosos.

A Lei 1/1993, do 13 de abril, da Comunidade Autónoma de Galicia, de protección de animais domésticos e salvaxes en catividade impón á súa vez ós concellos a obriga de recollida dos animais abandonados e no artigo 27 do Decreto 153/1998 que a desenvolve, obriga a censar a nivel municipal a tódolos animais da especie canina.

A Comunidade Autónoma de Galicia desenvolve ámbalas dúas leis de forma harmónica no Decreto 90/2002, é unha das competencias propias que se lle recoñecen no artigo 3.2 da dita Lei 50/1999, ó abeiro da que se aproba tamén esta ordenanza.

En consecuencia, e consonte coas disposicións citadas, e ó abeiro da Lei 7/1985, reguladora das bases de réximo; Lei 5/1997, do 22 de xullo, de administración local de Galicia, e os artigos 15 e 20 da Lei 39/1998, do 28 de decembro, reguladora das facendas locais, a Corporación aprobou esta ordenanza:

### **CAPÍTULO I**

#### **Disposicións xerais**

##### **Artigo 1º.- Obxecto**

1. É obxecto da presente ordenanza, a regulación da concesión das licenzas administrativas para a posesión de calquera animal clasificado como potencialmente perigosos na Comunidade Autónoma de Galicia, así como a regulación do Rexistro municipal de animais potencialmente perigosos e a inscrición na sección local do Rexistro galego de animais de compañía e das taxas pola concesión e renovación das licenzas e inscricións indicadas.

2. Quedan excluídos da aplicación da presente ordenanza os cans e animais pertencentes ás Forzas Armadas, forzas e corpos de seguridade do Estado, corpos da policía

das comunidades autónomas, Policía Local e empresas de seguridade con autorización oficial.

## **Artigo 2º.- Definición de animal potencialmente perigoso**

1. Considéranse animais potencialmente perigosos, tódolos que pertencendo á fauna salvaxe, sendo utilizados como animais domésticos, ou de compañía, con independencia da súa agresividade, pertencen a especies ou razas que teñan capacidade de causa-la morte ou lesións ás persoas ou a outros animais e danos a cousas.

2. En particular terán a cualificación de potencialmente perigosos, os animais domésticos ou de compañía que regulamentariamente se determinen pola Comunidade Autónoma de Galicia, en particular os pertencentes á especie canina definidos no artigo 2.2 do Decreto 90/2002, do 28 de febreiro, polo que se regula a posesión de animais potencialmente perigosos na Comunidade Autónoma de Galicia e se crean os rexistros galegos de identificación de animais de compañía e potencialmente perigosos e de adestradores caninos.

3. En todo caso, aqueles cans que manifesten unha marcada agresividade natural ou inducida mediante adestramento, malos tratos ou calquera outro medio. Esta agresividade será apreciada pola autoridade competente, de oficio, ou previa notificación ou denuncia, e despois dun informe dun adestrador ou veterinario designado para tal efecto.

## **CAPÍTULO II**

### **Da licenza municipal**

## **Artigo 3º.- Licenza municipal**

1. A posesión no municipio de animais clasificados como potencialmente perigosos requirirá a obtención, con carácter previo á adquisición do animal, da correspondente licenza municipal.

2. Están obrigados á obtención de licenza municipal para a posesión de animais clasificados como potencialmente perigosos os propietarios ou posuidores destes incluídos no padrón de habitantes, así como os establecementos ou asociacións, con sede neste municipio, que alberguen animais potencialmente perigosos ós que se refire o Decreto 90/2002, do 28 de febreiro, da comunidade autónoma galega, e se dediquen á súa explotación, cría, comercialización ou adestramento, incluídos os centros de adestramento, criadeiros, centro de recollida, residencia, centros recreativos e establecementos de venda colocados neste municipio.

3. Os propietarios de animais potencialmente perigosos non aveciñados neste Concello deberán acreditar, cando se encontren residindo temporalmente neste e mentres permaneza o animal no termo municipal, a posesión da licenza no municipio de orixe.

4. Nos casos de inscrición de animais como consecuencia de ter efectuado anteriores ataques a persoas, animais ou cousas, no Concello, unha vez coñecida a resolución ou sentenza, de oficio ou a instancia de calquera interesado directo, e previa tramitación de

expediente administrativo con audiencia do interesado, requirirá ó propietario mediante resolución da Alcaldía, co obxecto de que no prazo dun (1) mes proceda á solicitude de licenza, efectuándose no caso contrario a retirada e depósito do animal consonte o establecido no artigo 9 desta ordenanza.

#### **Artigo 4º.- Requisitos para a obtención da licenza**

1. Para a obtención da licenza administrativa con destino á posesión de calquera animal clasificado como potencialmente perigoso será necesario o cumprimento dos seguintes requisitos:

a) Ser maior de idade e non estar incapacitado para proporcionar os coidados necesarios ó animal.

b) Non ter sido condenado por delitos de homicidio, lesións, torturas contra a liberdade ou contra a integridade moral, a liberdade sexual e a saúde pública, de asociación con banda armada ou de narcotráfico, así como non estar privado por resolución xudicial do dereito á posesión de animais potencialmente perigosos.

c) Non ter sido sancionado por infraccións graves ou moi graves con algunha das sancións accesorias das previstas no apartado 3 do artigo 13 da Lei 50/1999, do 23 de decembro, sobre o réxime xurídico de animais potencialmente perigosos. Non obstante, non será impedimento para a obtención ou, no seu caso, renovación da licenza, ter sido sancionado coa suspensión temporal desta, sempre que, no momento da solicitude, a sanción de suspensión anteriormente imposta fose cumprida integramente.

d) Dispoñer de certificado de aptitude psicolóxica e de capacidade física para a posesión de animais potencialmente perigosos.

e) Acredita-la formalización dun seguro de responsabilidade civil por danos a terceiros que poidan causa-los seus animais na contía mínima de 125.000 euros.

2. Os requisitos esixidos deberán manterse vixentes durante todo o período da posesión do animal, a perda destes dará lugar á revisión da licenza nos termos recollidos no artigo 9 desta ordenanza.

#### **Artigo 5º.- Vixencia das licenzas**

1. As licenzas terán unha vixencia de cinco anos, á finalización da que deberán ser obxecto de renovación, debendo acreditarse en cada exercicio, para o seu mantemento:

a) A subscrición do seguro de responsabilidade civil por danos a terceiros.

b) A expedición do certificado de sanidade animal, espedido pola autoridade competente, que acredite con periodicidade anual, a situación sanitaria do animal e a inexistencia de enfermidades ou trastornos que o fagan especialmente perigoso.

2. A condena por calquera dos delitos recollidos no apartado b) do artigo anterior dará lugar á revisión da licenza polo Concello.

## **Artigo 6º.- Acreditación**

1. A identificación da posesión da licenza municipal de animais potencialmente perigosos acreditarase mediante entrega de certificación relativa a esta.

2. Por cada can que se posúa, expedirase unha tarxeta identificativa na que se farán consta-los seguintes datos:

- a) Número de licenza municipal.
- b) Código de identificación do can.
- c) Raza.
- d) Titular da licenza e DNI.
- e) Número de Rexistro municipal.

No dorso, faranse consta-las persoas autorizadas polo titular da licenza para uso temporal e transporte do animal.

## **Artigo 7º.- Documentación**

1. Para a expedición da tarxeta identificativa de cada can requirirase a presentación dos seguintes datos:

- a) Raza e sexo do animal.
- b) Ano de nacemento.
- c) Domicilio habitual do animal.
- d) Especificación se está destinado a convivir cos seres humanos ou se pola contra, ten finalidades distintas coma a garda, protección ou outra que se indica.
- e) Nome do propietario.
- f) Domicilio do propietario.
- g) DNI do propietario.
- h) Nome ou razón social e domicilio do vendedor ou cedente.
- i) Póliza de seguro de responsabilidade civil.
- j) Certificado de aptitude psicolóxica e física nos termos recollidos nos artigos 4 e 5 do Real decreto 287/2002, do 22 de marzo.
- ll) Certificado de penais.

m) Certificado de sanidade animal expedido pola autoridade competente, que acredite, con periodicidade anual, a situación sanitaria do animal e a inexistencia de enfermidades ou trastornos que o fagan especialmente perigoso.

n) Xustificante do aboamento da taxa por expedición da licenza municipal para a posesión de animais potencialmente perigosos.

ñ) Certificados sanitario de esterilización se se efectuou esta.

o) Memoria descritiva das instalacións e medidas de seguridade utilizadas para impedi-la fuxida dos animais conforme o artigo 3.4 do Decreto 90/2002, no seu caso.

p) Facturas e xustificante da adquisición.

Os citados datos e, no seu caso, a documentación oportuna, deberá facilitala o adquirinte do animal no prazo de quince días, que comezará a contar desde a súa posesión efectiva.

2. O certificado de sanidade animal deberá ser expedido polos servizos sanitarios da Comunidade Autónoma de Galicia ou por un veterinario colexiado.

3. Para a renovación da licenza municipal deberá presentarse a seguinte documentación:

a) Solicitud de renovación.

b) Copia compulsada da renovación do seguro de responsabilidade civil.

c) Copia compulsada do certificado médico de sanidade animal efectuado nunha data non anterior a dous meses á da renovación da licenza.

d) Xustificante do aboamento da taxa municipal.

e) Certificado de capacidade física.

f) Certificado de aptitude psicolóxica.

### **Artigo 8º.- Órgano competente para a concesión das licenzas municipais**

1. As licenzas municipais para a posesión de animais potencialmente perigosos, concederanse mediante resolución do órgano que teña atribuída a competencia en materia de licenzas, previa acreditación da incorporación da documentación esixida na presente ordenanza.

### **Artigo 9º.- Revisión, perda de licenzas e depósito de animais**

1. A perda de calquera dos requisitos esixidos no artigo 4 desta ordenanza, dará lugar á revisión das licenzas municipais concedidas e a súa retirada previa tramitación de expediente contradictorio.

2. A retirada da licenza dará lugar á perda do dereito á posesión do animal e á obriga do interesado de proceder, no prazo máximo de dez días, que comezará a contar desde a recepción do requirimento, á súa entrega e depósito no establecemento adecuado para tal efecto ata a obtención desta, salvo que o animal sexa obxecto de entrega a outro propietario ou sacrificio nos termos establecidos nos artigos 58, 59 e 60 do Decreto 153/1998, da comunidade autónoma de Galicia.

3. En caso de incumprimento da obriga de depósito procederase á súa execución subsidiaria polo Concello, ou a Comunidade Autónoma, a través dos seus servizos ou mediante empresa contratada, sendo os gastos que tal actuación comporta a cargo e conta do antigo titular da licenza.

4. O Concello poderá retirar dos espazos públicos e depositar de oficio en establecemento adecuado, sen necesidade de previo requirimento, a aqueles animais potencialmente perigosos nos que se aprecie unha situación de abandono ou perigosidade para os usuarios das vías e espazos de uso común ou circulen por estes sen a debida protección ou control do seu propietario ou posuidor.

5. Igualmente o Concello poderá retirar e depositar en establecemento axeitado aqueles animais potencialmente perigosos que non dispoñían da correspondente tarxeta de identificación no municipio de orixe ata tanto se acredite tal circunstancia polo titular deste.

6. A falta de licenza municipal para a posesión de animais potencialmente perigosos dará lugar a un único requirimento municipal para a súa obtención no prazo de dez días e á retirada e depósito dos animais, nos termos establecidos neste artigo.

## **CAPÍTULO III**

### **Do Rexistro municipal**

#### **Artigo 10º.- Rexistro municipal de animais potencialmente perigosos**

1. Créase o Rexistro municipal de animais potencialmente perigosos, cun tratamento informatizado, no que se fará constar con carácter obrigatorio de acordo con Decreto 90/2000, do 28 de febreiro, da comunidade autónoma de Galicia, a seguinte documentación:

- a) Código identificador do animal.
- b) Zona de aplicación.
- c) Especie.
- d) Raza. No cruzamento de primeira xeración especificaranse as razas de procedencia.
- e) Sexo.
- f) Descrición da capa.
- g) Data de nacemento do animal.

h) Dirección habitual do animal.

i) Outros signos identificatorios non definitivos (coma unha tatuaxe ou un número de chapa se o animal foi censado nun censo municipal anteriormente).

l) Especificación de se o animal está destinado a convivir con seres humanos ou se teñen finalidades distintas como a garda, defensa ou outra que se indique.

ll) Nome e apelidos do propietario do animal.

m) Dirección do propietario do animal.

n) Teléfonos de contacto do propietario do animal.

ñ) DNI do propietario do animal.

o) Nome, dirección, número de colexiado e número de veterinario colaborador que realiza a marcaxe.

p) Data na que se realiza a implantación da identificación e a entrega do documento ó propietario.

q) Data de alta no Rexistro.

r) Certificado sanitario, expedido por un veterinario, que acredite con periodicidade anual, a situación sanitaria do animal e a inexistencia de enfermidades ou síntomas que o poidan facer potencialmente perigoso, así como unha certificación de que o animal carece de lesións ou cicatrices que puidesen estar relacionadas coa utilización do animal en pelexas ou outras actividades prohibidas.

s) Libreta sanitaria actualizada nos tratamentos preceptivos e preventivos propios da especie e idade. Na libreta sanitaria figurará a catalogación de animal potencialmente perigoso.

t) Copia da licenza municipal de posesión de animais potencialmente perigosos, a nome do propietario. Acompañarase de copia da póliza que xustifique ter formalizado o seguro de responsabilidade civil.

u) Datos do centro de adestramento, se fose o caso.

v) Incidentes de agresión, se fose o caso.

2. Os propietarios dos animais serán os responsables de identifica-los animais e de sufraga-los gastos que esto ocasione, independentemente do lugar de residencia das ditas persoas. A identificación definitiva suporá un requisito previo e obrigatorio para realizar calquera transacción do animal.

3. O Rexistro municipal é un rexistro de carácter público, ó que terán acceso as administracións públicas e autoridades competentes, así como aquelas persoas físicas ou

xurídicas que acrediten ter interese lexítimo no coñecemento dos datos obrantes neste. Para estes efectos considerárase, en todo caso, interese lexítimo o que ten calquera persoa física ou xurídica que desexe adquirir un animal destas características, así como aquelas que sufrisen calquera tipo de agresión polo animal e desexen exercer as accións correspondentes en calquera vía xurisdiccional, para o que deberán acreditar previamente a interposición da correspondente denuncia.

4. En todo caso, o uso e tratamento dos datos contidos no Rexistro será de acordo co disposto na Lei orgánica 15/1999, de protección de datos persoais.

### **Artigo 11º.- Inscripción no Rexistro**

1. A inscrición no Rexistro de animais potencialmente perigosos efectuarase de oficio polo Concello trala concesión da licenza municipal regulada no artigo 3 da presente ordenanza.

2. Non obstante, será igualmente obrigatoria a instancia do interesado, a inscrición no Rexistro municipal, en sección aberta para tal efecto, cando se efectúe o traslado dun animal potencialmente perigoso a este Concello, sexa con carácter permanente ou por período superior a tres meses, debendo proceder á inscrición no prazo máximo de dez días, que comezará a contara dende o inicio da residencia no municipio.

3. Estimarase que se efectuou un traslado de animal potencialmente perigoso, salvo acreditación expresa en contrario polo interesado, nos casos de cambio de residencia do titular deste, en tal caso será preciso a acreditación da obtención da licenza no municipio de orixe anterior, procedendo á renovación da licenza nos casos previstos na presente ordenanza.

4. Das inscricións que se efectúen no Rexistro municipal de animais potencialmente perigosos darase traslado ó órgano correspondente da Comunidade Autónoma de Galicia.

5. Igualmente nos casos de cambio de residencia desde o municipio sen prexuízo da obriga do interesado de dar conta do traslado do animal, notificárase ó Concello do municipio de nova residencia a titularidade por parte do interesado dun animal potencialmente perigoso.

### **Artigo 12º.- Baixa no Rexistro municipal de animais potencialmente perigosos**

1. A baixa no Rexistro municipal de animais potencialmente perigosos efectuarase a instancia do interesado, previa acreditación da venda, traspaso, cesión ou morte do animal.

2. Igualmente procederáse á baixa no Rexistro no caso de traslado da residencia do titular do animal a municipio distinto e así quede acreditado, xa sexa a instancia do interesado ou de oficio polo Concello.

3. Farase figurar no Rexistro como de titularidade municipal aqueles animais depositados nas súas instalacións como consecuencia de recollida destes da vía pública ou por perda da licenza do seu anterior titular.

### **Artigo 13º.- Sección local do Rexistro galego de identificación de animais de compañía**

1. Ó abeiro dos principios de lealdade institucional, cooperación e colaboración previstos no artigo 4 da Lei 30/1992, establécese unha sección local da sección do Rexistro de identificación de animais de compañía, limitada ós cans residentes no termo municipal, que se formará cos datos que para tal efecto se remitan polo Rexistro galego. Cos datos contidos na sección do Rexistro, formarase en data 31.12 de cada ano, o censo ó que se refire o artigo 27 do Decreto 153/1998.

2. Nese Rexistro farase consta-la información contida no apartado 5 do artigo 5 do Decreto 90/2002, do 28 de febreiro, da comunidade autónoma de Galicia, e que se recollen tamén nas letras da a) á s) do apartado 1 do artigo 10 da presente ordenanza.

#### **Artigo 14º.- Circulación e permanencia do can en vías públicas e locais**

1. Nas vías públicas e os espazos naturais protexidos os cans irán suxeitos con cadea ou correa.

2. Os cans guía poderán circular libremente nos transportes públicos urbanos, sempre que vaian acompañados polo seu dono e cumpran as condicións hixiénicas, sanitarias e de seguridade que prevén as ordenanzas.

3. Queda expresamente prohibida a entrada ou estadía de animais domésticos en toda clase de locais destinados á fabricación, almacenamento, transporte, venda ou manipulación de alimentos.

4. Queda asemade prohibida a entrada ou estadía de animais domésticos en restaurantes, bares, cafeterías e similares.

5. Prohíbese a circulación ou a estadía de cans e outros animais nas piscinas públicas e locais de espectáculos públicos, deportivos e culturais e nos recintos escolares.

6. Os titulares destes locais deberán colocar na entrada dos establecementos e en lugar visible o sinal identificativo desta prohibición.

7. Quedan exentos das prohibicións anteriores os cans guía que acompañen a persoas invidentes.

8. Queda prohibido deixa-las deposicións fecais dos cans nas vías públicas. Os propietarios de cans son responsables de recoller convenientemente os excrementos e depositalos ou ben en bolsas de lixo domiciliario, ou ben naqueles lugares que a autoridade municipal destine expresamente á esta finalidade.

9. Queda expresamente prohibido que os cans accedan ás zonas de xogo infantil das prazas e parques do municipio.

10. Prohíbese lavar animais na vía pública e fontes, así como darlles de beber auga amourados ás billas das fontes públicas.

11. Consonte ó establecido no artigo 112 apartado 5 do Decreto 90/2002, do 28 de febreiro, da comunidade autónoma de Galicia, os cans catalogados como potencialmente perigosos terán que circular polas vías públicas e en lugares e espazos de uso público en

xeral, atados con cadea ou correa non extensible de lonxitude non superior a dous metros, provistos da correspondente buceira homologada e axeitada para a súa raza, e en ningún caso, poderán ser conducidos por un menor de 18 anos.

## **CAPÍTULO IV**

### **Infraccións e sancións**

#### **Artigo 15º.- Infraccións**

1. As infraccións que se cometan contra o disposto nesta ordenanza clasifícanse en moi graves, graves e leves.

2. Terán a consideración de infraccións administrativas moi graves, as previstas no artigo 13.1 da Lei 50/1999, do 23 de decembro, do Estado, así como as establecidas no artigo 21 da Lei 1/1993, do 13 de abril, da comunidade autónoma de Galicia.

4. Son infraccións administrativas leves o incumprimento de calquera das obrigas establecidas nesta ordenanza, na Lei 50/1999, do 23 de decembro, do Estado, e na Lei 1/1993, do 13 de abril, da comunidade autónoma de Galicia, non comprendidas nos parágrafos anteriores e que a competencia corresponda ó Concello, consonte o previsto no artigo 20.3 a) do Decreto 90/2002, do 28 de febreiro, da comunidade autónoma de Galicia, e en particular os seguintes:

a) A non presentación no prazo requirido da documentación complementaria esixida no artigo 6.2 desta ordenanza.

b) A non renovación no prazo dun (1) mes da licenza concedida para a posesión de animais potencialmente perigosos.

c) A non presentación cando lle sexa requirida da licenza do municipio de orixe de animais potencialmente perigosos polos propietarios non aveciñados neste Concello.

#### **Artigo 16º.- Sancións**

1. As infraccións tipificadas no artigo anterior serán sancionadas con multas e as contías correspondentes serán as fixadas no artigo 13.5 da Lei 50/1999, do Estado, e no artigo 24 da Lei 1/1993, da comunidade autónoma de Galicia.

2. En todo caso, as infraccións graves e moi graves tipificadas no artigo anterior desta ordenanza, poderán levar aparelladas como sancións accesorias a confiscación, comiso, esterilización ou sacrificio dos animais potencialmente perigosos, a clausura do establecemento e a suspensión temporal ou definitiva da licenza para posesión de animais potencialmente perigosos ou do certificado de capacitación do adestrador.

#### **Artigo 17º.- Responsable**

1. Considéranse responsables das infraccións aquelas persoas que por acción ou omisión participasen na comisión destas, o propietario ou posuidor dos animais, ou no seu

caso, o titular do establecemento, local ou medio de transporte no que se produzan os feitos, e neste último suposto, asemade, o encargado do transporte.

### **Artigo 18º.- Procedemento sancionador**

1. O procedemento sancionador aplicable rexerese polo establecido na Lei 50/1999, do 23 de decembro, así como a Lei 30/92, do 26 de novembro, e normas de desenvolvemento.

### **Artigo 19º.- Exercicio da potestade sancionadora**

1. Os órganos competentes para sancionar, de acordo co artigo 24.2 da Lei 1/1993, do 13 de abril, da comunidade autónoma de Galicia, serán:

a) Por infraccións leves, o alcalde.

b) Por infraccións graves, o director xeral de Conservación da Natureza da Consellería de Medio Ambiente.

c) Por infraccións moi graves, o conselleiro do Medio.

2. A incoación e tramitación dos expedientes polas infraccións tipificadas como leves correspóndelle ó Concello.

Non obstante, o alcalde porá en coñecemento de xeito fidedigno, do director xeral de Conservación da Natureza da Consellería de Medio Ambiente, toda acción ou omisión que poida ser tipificable como infracción grave ou moi grave.

3. Cando as circunstancias de perigo así o aconsellen, o alcalde poderá proceder á retirada ou custodia dun animal potencialmente perigoso, a cargo do propietario, como medida de carácter provisional durante a tramitación dun expediente sancionador.

## **CAPÍTULO V**

### **Da taxa por expedición de licenza, renovación, inscrición rexistrais e as súas modificacións e cancelacións**

#### **Artigo 20º.- Obxecto**

1. Consonte ó disposto nos artigos 15 a 19 en relación co artigo 20 da Lei 39/88, do 28 de decembro, do Estado, reguladora das facendas locais, establécese a taxa por prestación de servizos especiais de expedición de licenza, as súas renovacións, inscricións rexistrais e as súas modificacións e cancelacións.

#### **Artigo 21º.- Feito imponible**

1. O feito imponible da taxa é a actividade municipal conducente á verificación do cumprimento das condicións reguladas nesta ordenanza para a concesión da licenza indicada, a actividade de control que se efectuará nas renovacións que dela deban verificarse, a

tramitación, control e custodia que dela se establece e aquel outros servizos que se recollen nas tarifas desta ordenanza.

### **Artigo 22º.- Suxeito pasivo**

1. Son suxeitos pasivos da taxa os propietarios de animais que soliciten a inscrición no Rexistro municipal e que están obrigados á súa renovación.

2. En particular serán suxeitos pasivos os titulares dos establecementos ou asociacións que alberguen animais potencialmente perigosos e se dediquen á súa explotación, cría, comercialización ou adestramento, incluídos os centros de adestramento, criadeiros, centros de recollida, residencias, centros recreativos e establecementos de venda.

### **Artigo 23º.- Responsables**

1. Responderán solidariamente das obrigas tributarias do suxeito pasivo as persoas físicas e xurídicas a que se refiren os artigos 38.1 e 39 da Lei xeral tributaria.

2. Serán responsables subsidiarios os administradores das sociedades e os síndicos, interventores ou liquidadores de quebras, concursos, sociedade e entidades en xeral, nos supostos e co alcance que sinala o artigo 40 da Lei xeral tributaria.

### **Artigo 24º.- Devengo**

1. O devengo da taxa producirase coa solicitude de calquera dos actos ós que se refire o feito imponible.

2. A non concesión da licenza, cando non sexa debido a incumprimentos formais do suxeito pasivo, dará lugar á devolución das cantidades autoliquidadas.

### **Artigo 25º.- Tarifas**

1. Licenza de cans potencialmente perigosos: 18 euros.
2. Ficha identificativa individual: 6 euros.
3. Renovación de licenzas: 9 euros.
4. Inscrición no Rexistro APP: 12 euros.
5. Modificacións rexistrais: 3 euros.
6. Cancelación rexistral: 6 euros.

### **Artigo 26º.- Ingreso da taxa**

1. O ingreso da taxa efectuarase en réxime de autoliquidación e con carácter previo ó acto que o motiva.

### **Artigo 27º.- Infraccións e sancións**

1. En todo o relativo á cualificación de infraccións tributarias, así como das sancións que a estan corresponden en cada caso, estarase ó disposto nos artigos 77 e seguintes da Lei xeral tributaria.

### **DISPOSICIÓN ADICIONAL ÚNICA**

1. Quedan excluídos da obriga de obtención de licenza municipal, aqueles exemplares caninos que fosen obxecto de adestramento baixo a supervisión directa da Once e sexan destinados a guía de persoas invidentes.

### **DISPOSICIÓN FINAL**

1. A presente ordenanza entrará en vigor coa súa publicación íntegra no Diario Oficial correspondente e comezará a aplicarse a partir do día seguinte, continuando en vigor ata a súa derogación expresa polo Concello.